

永平府志卷之六

建置志 三

古蹟考

此冊雜取諸家論說今增刪存之

孤竹城 漢書令支有孤竹城魏書肥如有孤竹山祠

水經注元水又西南經孤竹城北西入濡水又云祠

在山上城在山側肥如縣南十二里水之會也史記

正義引括地志云孤竹古城在盧龍縣南十二里

縣唐武德二年更名盧龍 今城南已無其跡而祠在府城西北二

十里灤河之左洞山之陰夾河有孤竹君三塚豈唐

之盧龍治尚在其東北耶又案遼史云興中府本古

永平府志

卷之六

古蹟考

一

孤竹國漢時為柳城地則又在今祠東北五百餘里

幅員之廣幾方千里舊志引爾雅孤竹北戶以為孤

竹是北荒之總名蓋猶五嶺以南言甌言越本其國

名後乃槩而稱之耳郭造卿曰今有土築堦垣不過

千年物耳宇內商周城其存者有幾哉未可信以為

孤竹之古城也

山戎國 春秋莊公三十年冬齊人伐山戎史記山戎

越燕而伐齊齊釐公與戰於齊郊其後四十四年而

山戎伐燕燕告急於齊齊桓公北伐山戎山戎走杜

預春秋註曰山戎北狄胡三省通鑑註曰自漢北平



無終白狼以北皆大山重谷諸戎居之春秋謂之山戎郭造卿曰山戎北戎是二種山戎種一爲無終齊伐之晉滅之北戎種二東爲離支齊所滅西爲代晉所滅自燕東北爲遼西遼東以外無非北戎地西北爲上谷以外無非山戎地而北戎爲尤大故必平山戎而同許男以伐之

令支城 國語云桓公北伐山戎荆令支斬孤竹史記齊世家作離支周書王會作不令支皆令支之轉也二漢遼西郡俱有令支獨晉書地理志無之而于其末曰慕容熙以幽州刺史鎮令支其見於載記者段

氏都令支石虎伐段遼入令支以李農爲營州牧鎮令支命段蘭帥所從鮮卑屯令支燕餘巖據令支慕容農克令支蘭和屯令支李朗留其子養令支李旱克令支慕容懿以令支降魏魏宿沓干拔令支慕容拔攻克令支其地在燕之東陞故爲重鎮入魏太平真君七年乃併於陽樂矣水經注濡水東南流經令支縣故城舊志令支城在遷安東蓋亦近之

長城 長城始于燕時歷代築之非一史記燕築長城自造陽至襄平置上谷漁陽右北平遼西遼東郡以拒胡秦始皇帝使蒙恬築長城起臨洮至遼東河餘

里正義引括地志長城首起岷州西十二里東入遼水齊顯祖天保六年發民一百八十萬築長城自幽州夏口西至恒州九百餘里七年自西河總秦戍築長城東至於海後主天統元年自庫堆戍東距于海隨山屈曲二千餘里斬山築城置立戍邏五十餘所周宣帝大象元年發山東諸民修長城立亭障西自鴈門東至碣石隋文帝開皇六年二月發丁男十一萬修築長城七年二月發丁男十萬餘修築長城長城之見於史者如此今人言長城必曰秦時築考之晉太康地理志長城起樂浪之碣石山魏書長孫陳傳爲羽林郎征和龍賊自西門出將犯外圍陳擊退之追至長城下是長城在龍城之外而通典亦言薊州北至廢長城塞二百三十五里然則今山海關之長城乃徐魏公所修之城非古之長城也一統志秦長城在府北七十里誤

右北平郡 漢右北平郡治平剛後漢治土垠水經注魏氏土地記曰薊州東北三百里有右北平城今京師也括地志漁陽郡東南七十里有右北平城案當在今薊州玉田界此後漢之右北平也若平剛則在盧龍塞之東北三四百里此前漢之右北平而李

廣之所守也舊志云今府城南有李將軍射虎石固
謬水經註言此石在玉田無終之間是亦以後漢之
右北平爲李廣所治與東越青陘之說自相矛盾矣
平剛縣 三國志田疇傳舊北平郡治在平岡道出盧
龍達于柳城自建武以來陷壞斷絕垂二百載而尙
有微徑可從魏太祖紀上徐無山出盧龍歷平岡登
白狼堆去柳城二百餘里水經註盧龍東越青陘至
凡城二百里許自凡城東北出趨平罡故城可百八
十里向黃龍則五百里是平剛在盧龍之東北四百
里矣晉書成帝紀咸康四年二月石虎帥衆七萬擊
段遼于遼西遼奔于平岡慕容皝載記遣揚威將軍
淑虞攻烏丸悉羅俟於平塌其字本作剛字一作岡
又作崗亦作塌又作罡

石城縣 漢右北平郡之縣十六其三曰石城後漢無
之蓋光武所併省也至燕分置石城郡考之通鑑及
晉載記得二事慕容寶宿廣都黃榆谷清河王會勒
兵攻寶寶帥輕騎馳二百里晡時至龍城會遣騎追
至石城不及是廣都去龍城二百里而石城在其中
間也慕容熙敗于北原石城令高和與尙方兵於後
作亂註云高和本爲石城令時以大喪會於龍城是

石城去龍城不遠也魏書地形志廣興下云有鷄鳴山石城大柳城此卽漢之石城矣魏太平真君八年置建德郡治白狼城領縣三其一曰石城有白鹿山祠其二曰廣都水經註石城川水出西南石城山東流逕石城縣故城南北屈逕白鹿山西卽白狼山也又東北入廣成縣東廣成卽廣都城燕之石城在廣都之東北而此在廣都之西南是魏之石城非燕之石城矣隋書始無石城云北齊廢之而唐書平州石城下云本臨渝武德七年省貞觀十五年復置萬歲通天二年更名有臨渝關有大海有碣石山是武后所更名之石城又非魏之石城遼史灤州統縣三其三日石城下云唐貞觀中於此置臨渝縣萬歲通天元年改石城縣在灤州南三十里唐儀鳳石刻在焉今縣又在其南五十里遼徙置以就鹽官是遼之石城又非唐之石城矣今之開平中屯衛自永樂三年徙于石城廢縣在灤州西九十里乃遼之石城而一統志以爲漢舊縣何其謬與

土垠縣 後漢爲右北平郡治耿弇傳光武遣弇與吳漢等十三將軍追賊至潞東及平谷再戰斬首萬三千餘級遂窮追於右北平無終土垠之間至浚靡而

還註云土垠故城在今平州西南案水經註巨梁水
出土垠縣北陳官山陳官山在今豐潤縣北七十里
則土垠當在今豐潤境內唐時未立豐潤故註云平
州西南耳一統志乃云在府城西南則沿此註而失
之也

欒志謂今豐潤東十里
垠城鋪卽古土垠城

遼西郡 漢治且慮後漢晉治陽樂魏治肥如北齊省
入肥如杜佑曰漢遼西郡故城在盧龍城東至隋改
置遼西郡于營州之境汝羅故城唐武德六年又徙
于幽州城中則皆非本境矣

肥如縣 漢書註應劭曰晉滅肥肥子奔燕燕封于此

漢初爲侯國史記功臣表肥如侯蔡寅是也傳三世
至孝景元年侯奴薨亡後而肥如改爲縣荆燕世家
肥如令郢人是也是時肥如雖爲縣而屬于燕故燕
王得以殺肥如令及武帝析藩國置緣邊諸郡而肥
如自此定屬于遼西矣見于史者後漢書和帝紀永
元九年秋八月鮮卑寇肥如劉虞傳前中山相張純
等衆十餘萬屯肥如晉書載記帝遣幽州諸軍討慕
容廆戰于肥如慕容熙大城肥如以 劉木爲鎮南
大將軍冀州刺史鎮肥如地理志高雲以幽冀二州
收鎮肥如魏書馮宏傳黜世子崇令鎮肥如肅宗紀

城平州所治肥如章懷太子註云故城在今平州而漢書言有元水濡水盧水魏書言有孤竹山祠令支城黃山濡河水經注言肥如縣南十二里水之會也則在今盧龍之境無疑矣燕慕容垂世子令說其父守肥如之險以自保胡三省註以爲卽盧龍之塞蓋今沿邊一帶大山長嶺古口亦屬之肥如也與

海陽縣 漢初爲侯國史記功臣表海陽侯搖母餘是也傳四世至季景四年侯省薨亡後而海陽改爲縣漢書言有龍鮮水封大水緩虛水皆南入海有鹽官水經註云濡水過令支縣又東南過海陽西南入于

永平府志

卷之六

古蹟考

七

海當屬樂亭境內至魏書地形志海陽下有橫山新婦山清水水經註又云清水出海陽縣東南流逕海陽城東今樂亭無橫山新婦山而清水又在縣西是魏海陽當非漢海陽至唐于海陽縣改馬城縣金于海陽縣改山海縣皆魏之海陽惟遼史稱海陽濱海地多鹹鹵則今樂亭地也

山海志謂卽今海洋城在關西四十里洋當作陽亦非

驪城縣 畿輔通志云在樂亭縣西按此應據歐陽忞地輿廣記指遼之石城縣今開平鎮爲驪城也然漢書右北平郡驪城下云大碣石山在縣西南今縣西

南無碣石遺跡而世所指天橋柱爲碣石者則在縣東南昌黎境是驪城故縣當屬昌黎不屬樂亭矣

漠州 畿輔志云漠州在樂亭治元置是爲東漠按元史樂亭下初嘗於縣置漠州尋廢復爲樂亭隸灤州字蓋作漠不作漠抑五代時斯地已有漠州

望都鎮 舊云在樂亭境內按遼史太祖以定州望都縣俘戶置本漢海陽縣遼時海陽馬城偕望都並置則是七十里之地且分爲三有是理乎况其屬有海陽山在平州南三十里按之地勢亦不甚合一統志謂海陽在府城南三十里乃勦遼史望都條下之文

永平府志

卷之六

古蹟考

八

新橋鎮 舊云在樂亭縣南卽新橋海口按明史永樂七年倭寇樂亭海口營因爲巨鎮然稽金史地志樂亭下鎮一新橋是自金有之非始于明也

陽樂縣 後漢爲遼西郡治晉愍帝建興元年慕容翰攻段氏取徒河新城至陽樂魏書有武歷山覆舟山林榆山太真山山名轉易多不可考但言太平真君八年併令支屬于此而章懷太子云陽樂在今平州東則知不出盧龍之境撫寧志乃云陽樂城在西關外無據

新安平縣 漢遼西郡之縣後漢省今不詳所在但據

漢書云夷水東入塞外水經注云新河自板渠東出合封大水謂之交流合水出新平縣西南流逕新平縣故城西又東南流龍鮮水注之合而東流注封大水亂流南會新河南流于海其曰新平卽漢之新安平申脫一字耳詳其水道則知其縣必在海陽肥如之間明一統志新安鎮在樂亭西北二十二里當卽其地

臨渝縣 漢書有渝水侯水後漢志有碣石山晉無此縣而通鑑載褚匡說馮跋曰章武郡臨海舟楫可通出於遼西臨渝不爲難也水經注渝水西南巡山逕

一故城以爲河連城疑是臨渝縣之故城渝水南流東屈與一水會世名之曰檻倫水通鑑榼盧城下註引此大約在今撫寧之東其城不可考矣

叅縣 漢書下官水南入海又有揭石水賓水皆南入官文穎曰碣石在遼西叅縣叅縣今罷屬臨渝水經注濡水又東南至叅縣碣石山似在今昌黎撫寧之境而一統志以爲今義州衛未詳何據

交黎縣

見下

柳城縣 史言慕容皝以柳城之北龍山之西福德之地乃營立宗廟宮闕命曰龍城一統志柳城在永平

府西二十里龍山在府西四十里永平府舊志柳城在昌黎縣西南六十里漢末爲烏桓所據曹操滅之歷魏晉爲慕容氏父子所據隋置縣屬遼西郡唐置營州元省入昌黎爲靜安社二說不同今府西二十里全無遺跡而靜安社則嘉靖三十一年立爲堡然皆非柳城之舊也案唐書營州柳城郡下云城西四百八十里有渝關守捉城又云西北接奚北接契丹通典營州柳城郡下云東至遼河四百八十里南至海二百六十里西至北平郡七百里北至契丹界五十里東南到安東府二百七十里西南到北平郡七百里西北到契丹界七十里東北到契丹界九十里而平州北平郡下云東至柳城郡七百里西至漁陽郡三百里東北到柳城郡七百里是柳城在今永平之東北七百里而慕容氏之龍城昌黎及魏以後之營州並在其地唐萬歲通天元年爲契丹所陷聖歷二年僑治漁陽開元五年又還治柳城而今之昌黎乃金之廣寧縣大定二十九年改爲昌黎名同而地異也又案三國志魏武帝用田疇之言上徐無山塹山堙谷五百餘里經白檀歷平岡涉鮮卑庭東指柳城徐無山在今玉田則柳城在玉田之東北數百里

也北齊書顯祖伐契丹以十月丁酉至平州從西道
趨長塹辛丑至白狼城壬寅至昌黎城是昌黎在平
州之東北齊主之行急猶五日而後至也隋書漢王
諒伐高麗軍出臨渝關至柳城唐書太宗伐高麗還
以十月丙午次營州詔遼東戰亡士卒骸骨並集柳
城東南命有司設太牢上自作文以祭之丙辰皇太
子迎謁于臨渝關關在今撫寧之東則柳城又在其
東太宗之行遲故十日而後至也又案遼史興中府
古孤竹國漢柳城縣地慕容皝以柳城之北龍山之
南福德之地乃築龍城構官廟改柳城爲龍城縣而
遷都之號曰和龍宮魏爲遼西郡隋置營州煬帝改
柳城郡唐武德初改營州總管府尋爲都督府萬歲
通天元年陷李萬榮神龍初徙府幽州開元四年復
治柳城八年徙漁陽十年還柳城後爲奚所據太祖
平奚及俘燕民將建城命韓知方擇其處乃完葺柳
城號霸州彰武軍節度重熙十年升興中府統州二
縣四其一曰興中縣本漢柳城縣地太祖掠漢民居
此置霸城縣重熙中置府更名此文述柳城之故頗
爲詳備元世祖至元七年十月己丑降興中府爲州
以地圖案之當在今前屯衛之北但唐書平州下云

又有柳城軍永泰元年置蓋唐時柳城之地屢被陷沒移徙無常此其在平州者或卽今之靜安社未可知然不可以永泰元年之柳城爲古之柳城也且一統志於柳城廢縣旣云在府城西二十里矣而于土產則云人參麝香豹尾俱廢柳城縣出今府西二十里乃灤河之西河山之南沙土之地其能出此三物乎案唐書營州柳城郡貢人蔘麝香豹尾皮骨髓志本引之而不知府西二十里之誤也

盧龍塞 三國志魏太祖紀建安十二年北征烏桓至無終大水傍海道不通田疇請爲鄉導公從之引軍

出盧龍塞塞外道絕不通乃塹山堙谷五百餘里至白狼山田疇傳隨軍次無終時方夏雨水而濱海滂下澶滯不通虜亦遮守蹊要軍不得進太祖患之以問疇疇曰此道夏秋每常有水淺不通車馬深不載舟船爲難久矣舊北平郡治在平岡道出盧龍達於柳城自建武以來陷壞斷絕垂二百載而尙有微徑可從今虜將以大軍當由無終不得進而退懈弛無備若嘿回軍從盧龍口越白檀之險出空虛之地路近而便掩其不備蹋頓之首可不戰而禽也太祖曰善乃引軍還而署大木表於水側路傍曰方今暑夏

道路不通且俟秋冬乃復進軍虜候騎見之誠以爲大軍去也太祖令疇將其衆爲鄉導上徐無山出盧龍歷平岡登白狼堆去柳城二百餘里虜乃驚覺單于身自臨陣太祖與交戰遂大斬獲逐北至柳城通鑑晉穆帝永和五年趙王虎卒國內大亂慕容霸上書于燕主雋請伐趙雋曰鄴中雖亂鄧恒據樂安兵精糧足今若伐趙東道不可由也當由盧龍盧龍山徑險狹虜乘高斷要首尾爲患其若之何霸曰恒雖欲爲石氏拒守其將士顧家人懷歸志若大軍臨之自然瓦解臣請爲殿下前驅東出徒河潛趨令支出

其不意被必震駭上不過閉門自守下不免棄城逃潰然則殿下可以安步而前無留難矣雋從之六年二月雋遣霸將兵二萬自東道出徒河慕輿于自西道出螭螭塞雋自中道出盧龍塞以伐趙命慕輿塗槎山通道又孝武帝太元二十一年燕清河王會使征南將軍庫儻官偉建威將軍餘崇將兵五千爲前鋒偉等頓盧龍近百日魏書常景傳杜雒周反於燕州以景兼尙書爲行臺與幽州都督北平將軍元譚禦之景表求勒幽州諸縣悉入古城山路有通賊之處權發兵夫隨宜置戍以爲防遏肅宗從之別勅譚

西至軍都關北從盧龍塞據此二嶮以杜賊出入之路又詔景山中嶮路之處悉令捍塞隋書陰壽傳開皇初高寶寧引突厥攻圍北平令壽率步騎數萬出盧龍塞以討之已上諸史所載盧龍之事頗詳魏書新昌有盧龍山水經注濡水又東南逕盧龍塞塞道自無終東出渡濡水向林蘭陁東至青陁盧龍之險峻坂縈折故有九崢之名燕景昭元璽二年遣將軍步渾治盧龍道焚山刊石令通方軌刻石嶺上以紀事功杜氏通典盧龍縣在今平州城西北二百里張行人舊志云在今府城南一里誤矣

盧龍城 水經注濡水又東南逕盧龍故城東漢建安十二年魏武征蹋頓所築也

蹋頓城 晉書載記石虎謀伐昌黎遣曹伏將青州之衆渡海戍蹋頓城無水而還隋煬帝征高麗其右第七軍出蹋頓道

樂安城 晉書載記石虎將伐慕容皝具船萬艘自河通海運穀豆千一百萬斛于安樂城通鑑作樂安水經注濡水東南過遼西海陽縣又經牧城南分爲二水北水謂之小濡水東逕樂安亭北東南入海濡水東南流逕樂安亭南東與新河故瀆合魏太祖征蹋

頓所導也在今樂亭縣境

三陁 通鑑晉穆帝永和六年慕容霸軍至三陁魏征東將軍鄧恒惺怖焚倉庫棄樂安遁去註魏收地形志海陽縣有橫山蓋卽三陁之地

盧溥鎮 晉書地理志自幽州至於盧溥鎮以南地入于魏案魏書太祖紀范陽人盧溥聚衆海濱殺幽州刺史封沓于此蓋卽其所據之地以名鎮而燕之幽州乃令支也

螭螭塞 晉書載記慕容皝率騎二萬出螭螭塞長驅至于薊城通鑑晉孝武太元十年燕主垂遣慕容農

水平府志

卷之六

古蹟考

十五

出螭螭塞歷凡城趨龍城討餘巖

昌黎郡 案昌黎有五漢書遼西郡之縣其八曰昌黎

渝水首受塞外南入海東部都尉治應劭曰今昌黎後漢志作昌遼或黎字之訛也通鑑註昌黎漢交黎

縣屬遼西郡後漢屬遼東屬國都尉魏齊王正始五年鮮卑內附復置遼東屬國立昌黎縣以居之後立昌黎郡晉書武帝紀太康二年慕容廆寇昌黎二年安北將軍嚴詢敗慕容廆于昌黎成帝咸康二年慕容皝自昌黎東踐冰而進凡三百餘里至歷林口是則在渝水下流而當海口此一昌黎也晉書載記慕容

谷孰徙昌黎郡又云破宇文歸之衆徙其部人五萬餘落于昌黎及慕容盛之世有昌黎尹張順劉忠高雲以馮素弗爲昌黎尹馮跋之世有昌黎尹孫伯仁以史考之當去龍城不遠此又一昌黎也魏併柳城昌黎棘城於龍城而立昌黎郡志云有堯祠榆頰城狼水而列傳如韓麒麟韓秀谷渾孫紹之倫皆昌黎人卽燕之舊都龍城此又一昌黎也齊以後昌黎之名廢至唐太宗貞觀三年更崇州爲北黎州治營州之東北廢陽師鎮八年復爲崇州置昌黎縣後淪于奚遼史建州永康縣本唐昌黎縣地此又一昌黎也

遼太祖以定州俘戶置營州鄰海軍其縣一曰廣寧

郭造卿曰此與霸州彰武軍異地而史失詳別兩引其語皆柳城焉

金世宗大定二十

九年改爲昌黎相沿以至於今此又一昌黎也

營邱郡

晉書慕容廆立郡以統流人以青州人爲營

邱郡至魏罷營邱郡魏復置營邱郡水經注淪水又

東逕營邱城西

平州

平州之見于書者有三有地名有國名有州名

左傳宣公元年會于平州以定公位地名也史記朝

鮮傳封王陝爲平州侯功臣表又有平州侯昭涉掉

尾國名也其州名亦有二有漢末平州有晉平州有

後魏平州漢末公孫度自號平州牧及其子康康子
淵並據遼東此漢末之平州也平州本取遼東襄平為名魏分遼
東昌黎元菟帶方樂浪五郡為平州後還合為幽州
晉武帝咸寧二年十月分昌黎遼東元菟帶方樂浪
等郡國五置平州治昌黎當即漢之交黎此晉之平州也至
後魏平州乃治肥如而自齊以下因之遼史引公孫
度之平州于此則誤矣

朝鮮縣 漢晉屬樂浪延和元年徙朝鮮民于肥如置
此縣齊省入新昌

新昌縣 後漢晉屬遼東魏置此隋開皇六年省肥如
入新昌十八年改名盧龍

黃山宮 魏書肥如有黃山高宗紀太安三年十月詔
太宰常英起行宮于遼西黃山四年正月巡平州庚
午至遼西黃山宮常英傳夢日墜其所居黃山下水
中

渝關 隋書高祖紀開皇三年三月癸亥城榆關賀婁
子幹傳授榆關總管十鎮諸軍事高麗傳漢王諒師
出臨渝關關本以渝水名而史文或作榆一書之中
兩字互見唐書地理志石城有臨渝關一名臨間關
又云營州城西四百八十里有渝關守捉城高麗傳

帝總飛騎入臨渝關郭英傑傳帥萬騎及奚衆屯榆關賈循傳爲榆關守捉使契丹傳許欽澹徙軍入臨渝關奚傳魯蘇不能制奔渝關李忠臣傳襲榆關通鑑後梁均王乾化三年初幽州北七百里有渝關下有渝水通海自關東北循海有道道狹處纔數尺旁皆亂山高峻不可越北至進牛口舊置八防禦軍募土兵守之田租皆供軍食不入于薊幽州歲致繒纊以供戰士衣每歲早獲清野堅壁以待契丹契丹至輒閉壁不戰俟其去選驍勇據隘邀之契丹常失利走土兵皆自爲田園力戰有功則賜勲加賞由是契

丹不敢輕入寇及周德威爲盧龍節度使恃勇不修邊備遂失渝關之險契丹每芻牧於營平之間通典渝關在平州盧龍縣東一百八十里宋白曰渝關關城下有渝水入大海其關東臨海北有兔耳山覆舟山山皆陡峻山下循海岸東北行狹處纔通一軌三面皆海北連陸關西亂山至進牛柵凡六口柵戍相接此天所以限戎狄也一統志榆關在今撫寧縣東二十里又東二十里有榆關馬驛關之遺址久廢不可考或云徐武寧移之山海非也

臨渝宮

隋書地理志盧龍有臨渝宮煬帝紀大業十

年三月癸亥次臨渝宮

臨渝縣 隋書突厥傳營州刺史高寶寧作亂沙鉢畧與之合軍攻陷臨渝鎮

馬城縣 唐書地理志古海陽城也開元二十八年置以通水運遼史地理志在灤州西南四十里灤州志云州城南二十里官催一里社

千金冶城 唐書地理志馬城縣東北有千金冶城舊志在馬城廢縣北有城州志古城在州西七里孩古社蓋石沙可炒鐵今尙有遺石立水中

茂鄉鎮城 在灤州千金冶東

永平府志

卷之六

古蹟考

九

漢武臺 唐書太宗紀貞觀十九年九月戊午次漢武臺刻石記功

西硤石 東硤石 唐書地理志有西硤石東硤石二
戍契丹傳左鷹揚衛將軍曹仁師等戰西硤石黃麀谷敗績武后更詔夏官尙書王季傑等討契丹戰東硤石師敗季傑死之

海濱縣 遼史地理志潤州海陽軍統縣一曰海濱本漢陽樂縣地金人封天祚爲海濱侯北蕃地里書潤州在盧龍塞東北西至渝關四十里南至海三十里舊志云在山海關東一百二十步洪武中于其地置

東門遞運所其說似誤

遷民縣 遼史地理志遷州興善軍統縣一日遷民本漢陽樂縣地至金廢爲鎮元史文宗紀八月丁酉發中衛兵守遷民鎮庚子發宗仁衛兵增守遷民鎮庚戌發平灤民墜遷民鎮九月上都諸王也先帖木兒平章禿滿迭兒自遼東以兵入遷民鎮北蕃地理書遷州在臨渝關東五十里西至潤州四十里南至海二十里相傳以爲今之山海關

安喜縣 遼史地理志本漢令支縣地久廢太祖以定州安喜縣俘戶置在平州東北六十里金大中改名永平府志

卷之六

古蹟考

三

望都縣 遼史地理志本漢海陽縣久廢太祖以定州望都縣俘戶置有海陽山在平州南三十里金史本

漢海陽故城大定七年更名海山縣

今樂亭有望都鎮

義豐縣 遼史地理志本黃雒故城黃雒水北出盧龍山南流入於濡水世宗置縣金元二史並同乃灤州倚郭之縣當是洪武中併入州灤志謂元初省縣入州非也

松亭關 遼史地理志澤州有松亭關宋史劉敞傳奉使契丹素習知山川道徑契丹導之行自古北口至

柳河回屈殆千里故質譯人曰自松亭趨柳河甚徑且易不數日可抵中京何爲故道此譯相顧駭媿聞詢傳使契丹詢頗諳北方疆理時契丹主在靴淀迂者導詢繇松亭往詢曰此松亭路也胡不徑葱嶺而迂枉若是金史地理志松亭關國名斜烈只誤入灤州下宗敘傳出松亭關取牛遞于廣寧撻懶傳習古廼婆虜火護送常勝軍及燕京豪族工匠自松亭關入內地通註引金鹵節要景州今遵化之東北乃松亭關今之喜峯口是也

栗林 金史張覺傳左企弓等赴廣寧過平州覺使人

承平府志

卷之六

古蹟考

三

殺之于栗林下遼史言殺之灤河岸

長春宮 金史石城縣有長春行宮在長春淀舊名大

定淀大定二十年更灤州志以爲遼蕭太后所建非也遼之長春宮在長春州不在此舊志州城東八里有濯清亭在灤河西岸東南三十里有丹陽宮石城

卽今稻地集

歷年行幸見紀事

灤河縣 遼置與神山并屬澤州金廢州留神山以屬大定府而灤河縣并廢承安置惠州升孩兒館爲灤陽縣以隸之至泰和罷元復惠州無屬縣而置灤陽治焉舊志云張行人舊志遷安縣西北百六十里元

時立縣隸大寧路國朝廢縣爲營備禦官民居焉今人知營非故治指北坨垣爲故縣亦非也蓋遼縣在今灤陽營金灤陽縣在今漢兒莊遼人以南人爲漢兒而設南面官有漢兒司及漢兒行官都部署故館謂漢兒其官及民居之也地之山川環抱奇秀至今父老言古漢兒城焉蓋金史轉語以漢爲孩耳升館爲縣隔二十里非復故名殊也元之立治屬檀景都提舉司卽遼之陷河採煉而屬澤州者今因建營以名猶三屯驛曰灤陽永平驛曰灤河皆非故縣地也蓋山南曰陽水南曰陰山北曰陰水北曰陽漢莊在河北入灤故金以名縣焉遼之名河爲縣今之名陽爲驛者皆重山與灤隔其名與實違也惟永平驛臨灤漢莊驛臨澈而皆灤之支總以灤名焉乃信父老言不誣爲別遼金縣殊及元復縣無考今之爲營者治也

永平屯田總管府 元史兵志世祖至元二十四年八

月以北京採取材木百姓三千餘戶於灤州立屯設官署以領其事爲戶三千二百九十爲田一萬一千六百一十四頃四十九畝

大寧路海陽等處打捕屯田所 元史兵志世祖至元

二十三年以大寧遼陽平灤諸路拘刷漏籍放良孛
蘭奚人戶及僧道之還俗者立屯於瑞州之西瀕海
荒地開耕設打捕屯田總管府成宗大德四年罷之
止立打捕屯田所爲戶元撥并召募共一百二十二
爲田二百三十頃五十畝

龍紀城遷安縣北二十里省志云二百餘步楊買驢城
縣北四十里並相傳金蕭太后所築舊志云遼后世
蕭氏有宮衛兵平州既有提轄司其安喜以北交於
澤州之灤河多中京宮衛地此或其官帳軍耳金后
多徒單諸氏不如遼有宮衛妃有蕭氏而后無之

萬軍城 遷安縣東三十里山巔有土城周三百餘步
中有將臺遺址世傳唐太宗征高麗駐軍於此舊志
云今名爲帳房山或指爲軍所宿非也蓋遼國之法
天子踐位置宮衛分州縣析部族設官府籍帳戶備
兵馬崩則扈從后妃宮帳以奉陵寢有調發則丁壯
從戎事老弱居守國此特其軍府之帳臺所謂平州
提轄司也

五花城 在山海關西南八里連環五座相傳唐太宗
征遼時所築按太宗將征遼太常丞鄧素使高麗還
請于懷遠鎮增戍以逼之帝不從惟命北輸粟營州

多儲吉大人城耳自發雒陽春蔬亦不進懼其擾民
但明斥堠不塹壘雖逼鹵城終不敢出鈔而士運糧
單騎野宿如中國焉安得築城於此

洋河城 撫寧縣東南十五里亦云唐築舊志云或隋
之瀘河鎮也

山西城 撫寧縣西南五十里

靜安社城 昌黎縣西五十里舊志云其城見存周三
里高一丈八尺方輿勝覽燕慕容氏之福地也今龍
山正在靜安西北一統志柳城廢縣在府城南六十
里漢末烏桓所據曹操滅之歷魏晉爲慕容氏父子

所據隋置縣屬遼西郡唐置營州今爲靜安社異哉
陋乎無論不考古與書典異卽熙苑廣十里陵周數
里大城肥如及宿軍擬鄴爲門累級三層景雲山峯
高十七丈豈安此三里城丈有咫而已乎雖馮通焚
其宮殿而魏因其城爲營州治至唐不改曷削至茲
哉自盧龍名塞山名龍多矣彼之龍城在山西此山
在西北則城東南也兩龍其無別乎慕容業霸規摹
頗宏黜而如此其何以興熙而如此其何以亡謂之
靜安社者然與蓋今之昌黎乃遼之廣寧猶今之盧
龍乃魏之新昌必求其故則可坐而辨也

李家莊城 在灤州南四十里今爲李家莊社栢家莊
城州南五十里今爲淳風屯獨莫城州南九十里今
爲社二里地倂城州西南六十里今倂城社稻城土
城州西百二十里今長春社地唐山土城州西南百
二十里今橋頭社地舊志云此皆樂安諸城趙石虎
使典農中郎將王典帥衆萬餘屯田海濱以謀擊燕
者元立永平屯田總管府于馬城縣其昌國濟民豐
贍三署諸屯城也

姜女墳 在山海關東南海中其上有姜女祠世傳女
爲許姓居長故稱孟焉陝西同官人其夫爲范郎秦
永平府志 卷之六 古蹟考 三五
築長城郎操版至遼東不歸女製衣親送至此聞夫
亡哭而死土人于高阜祀之名曰望夫石石上有亂
杵跡夫秦無稱陝無稱郎者當是勦齊杞梁妻崩城
之事而附益其說不知其所謂長城者乃泰山下之
長城非遼東之長城也

舊志有張果老墓在撫寧縣東南七十里又有韓
湘墓蛇皮王墓在昌黎皆謬妄

雙雁坨 灤州南二十里明成化中瘞二雁以名

荒糧坨 灤州南五十里世傳唐太宗爲此以誑高麗
州境及遷安豐潤以此名者甚多又通州有虛糧臺

十餘座云前代對敵乏糧虛設以張聲勢州志云其處不一有六十餘座舊志疑以爲石虎伐燕時事太宗渡遼水征高麗夸人豈敢至此而安用此爲哉州西南八十里司家莊社北集西有項家坨長三四里產酸棗野葡萄荆棘其南瀦水數畝通任家港南流有古塚數十昔耕場出火內有盛甲鎗端俱銅鐵鑄金鍍相傳爲王者墓掘之風沙迷目復填之莫敢動望海臺 在府城東今不可考

播鼓臺 在灤州西百里松梁社志引冊府元龜唐太宗貞觀十九年十月征遼次漢武臺餘基三成旁有

祠至營城帝問侍臣對曰此漢武求仙之處其地臨大海多峻石險恠後人借此播鼓禦敵因號爲營城播鼓臺云是亦謊糧之類也

將臺 在灤州城西八十里康莊屯高丈五尺廣八尺長二十步不知何時築下有黃崖河或云卽料馬臺石幢 一在府城南街金時建今尙存一在遷安城東南隅明正德間巡按劉士元撤去幢高三丈方員六丈上有八稜下有二層花草人物雕刻玲瓏

元大寧路本奚部唐初其地屬營州貞觀中奚酋可度

內附乃置饒樂郡遼爲中京大定府金因之元初爲北京路總管府領興中府及義瑞興高錦利惠川建和十州七年降興中府爲州仍隸北京改北京爲大寧明洪武二十年置北平行都指揮使司于大寧二十二年置泰寧福餘朶顏三衛于兀良哈地在烏龍江南盧龍塞北以處降胡東自全寧抵喜峯外近宣府曰朶顏自錦義歷廣寧至遼山曰泰寧自黃泥窪踰瀋陽鐵嶺曰福餘在潢水北大寧外邊由冷口入貢置驛于遷安縣二十七年置驛傳自大寧至廣寧東西四百八十五里置十驛中路北平至開平七百

六十五里置十四驛西路至開平六百三十里置十三驛土木至宣府一百里置二驛迨燕王襲破大寧以寧王及大寧官軍歸北平永樂元年改北平行都指揮使司爲大寧都指揮使司隸後府徙于保定遷各衛於內地

時興州左衛置遷安

因兀良哈三衛來朝益求內

附以大寧故衛地使爲外藩自古北口至山海關爲朶顏自遼東廣寧前屯衛至廣寧白雲山爲泰寧自白雲山至開原爲福餘貢道並由喜峯口置把總提督之卽松亭關也達于三屯灤陽驛由遷安東北境朝京師而遷安驛徙于山海關是年東勝左衛自山

西行都司調至其右衛徙遵化開平中屯衛原設大
寧河嶺洪武中調真定府移置灤州義豐里石城廢
縣

宋王曾上契丹事曰出燕京北門至望京館五十里至
順州七十里至檀州漸入山五十里至金溝館將至
館川原平曠謂之金溝淀自此入山詰曲登陟無復
里候但以馬行記日約其里數九十里至古北口兩
旁峻崖僅容車軌又度德勝嶺盤道數層俗名思鄉
嶺八十里至新館過雕窠嶺偏槍嶺四十里至如來
館過烏灤河東有灤州又過黑斗嶺度雲嶺芹菜嶺

七十里至柳河館松亭嶺甚險峻七十里打造部落
東南行五十里至牛山館八十里至鹿兒峽館過蝦
蟆嶺九十里至鐵漿館過石子嶺自此漸出山七十
里至富谷館八十里至通天館二十里至中京大定
府城垣卑小方圓纔四里許門但重屋無築閣之制
南門曰朱夏門內通步廊多坊門又有市樓四曰天
方大衢通闕望闕次至大同館其門正北曰陽德閭
闔城西內西南隅岡上有寺城南有園圃宴射之所
自過北口居人草庵板屋耕種但無桑柘所種皆從
壠上虞吹沙所壅山中長松鬱然深谷中時見畜牧

牛馬橐駝多青鹽黃豕

鄭曉吾學編地理述曰國初卽古會州大寧地設北平行都司興營諸屯衛封建寧藩與遼東宣府聯絡東西爲外邊已而魏國公經畧自古北口至山海關增脩關隘爲內邊以故薊州西接居庸北折而東南抵海上盡漁陽盧龍皆其管內艘泛登萊陸走趙魏肩肘奚達襟帶原澤馮翊京師號稱雄鎮又地壤深厚樹畜魚鹽黍稷之利甲於圻內文皇靖難兀良哈內附廼徙北平行都司於保定爲大寧都司而散布興營諸衛於京府之境大寧地盡畀兀良哈通貢互市

永平府志

卷之六

附載

无

爲我藩籬朶顏大寧福餘三衛是也自是紅螺白雲之北棄與戎寇遼東宣府聲援隔絕諸夸裂我險阻闖我門庭要我官賞殘我吏民喜峯三屯密雲白羊僅僅收縮譬之左臂癱腫則上谷孤子後背偃僂則盧龍單薄哽其喉吭則遼海坐隔扼其胸腹則陵寢警逼失計甚矣正統以前夸心畏服方隅寧謐土木之變三衛爲也先鄉道始命都御史鄒來學經畧已而總兵叅將內臣增設日多三衛亦矯詐反覆然尙未敢顯言爲寇也宏治中守臣楊友張瓊燒荒掩殺無辜邊釁遂起正德以來部落旣蕃朶顏獨盛陽順

陰逆累肆侵噬花當脅求添貢把兒孫深入擄掠動稱結親迤北恫疑中國而叅將陳乾魏祥先後陷沒以故三衛日驕嘉靖中革蘭台輒要官賞請益貢禍機所伏不待智者而知也天壽山七陵在焉余嘗從祠官至長陵北望烽堞不數里已巳之變祠官不能至昌平昌平陵衛吏卒如僑寓增兵繕障於斯爲急古北口潮河川俱要害而潮河川本殘元避暑故道尤爲鹵衝作橋則浮沙難立爲塹則漲水易淤都御史洪鍾雖嘗設有關城勢孤難守議者欲塞川流建石墩數十令其錯綜宛轉下通流水上傳烽火亦一

策也喜峯口三衛貢道稍深峻燕河營太平寨馬蘭峪密雲四營聲勢相援鹵卽至中兩營當其衝燕河密雲相倚角遵化三屯建昌固其內防口當大挫永平梁城間無鹵患亦無海寇若乃山麓林莽樊樹阻固以供薪炭伐條枚日就踈薄嘉靖中胡守中又出塞盡斬遼金以來松林百萬自撤藩蔽矣

郭建初碣石叢談曰永平北境多係大寧州縣余嘗游灤陽興教寺有元至順二年碑題頗及記云燕之東北路曰大寧惠州西南鄉分灤陽林河社界山之陽平泉之側麓野之間有古招提上下二區同名興教

林巒秀異山水嘉奇川原寬博而資產豐饒境物繁興而雲游悉至四望東至大峪流水渠南至二郎坨西至三十二嶺西邊鷹愁澗北至大峪北白石頭向陽嶺界則凡林河社皆惠州地也今遷安肆林河社里有三其一在縣西百二十里東至太平寨營南至夾河社西至遵化縣北至喜峯口三屯營在內其二在縣西北百八十里東至太平寨社西至漢兒莊營南至三屯營北至喜峯口灤陽營在內其三在縣西北百六十里東至潘家口西至龍井關南至洪鴉寨北至三臺山漢兒莊在內皆惠州地若撫寧山海關

及石門則瑞州等地回安洋河二社見之古寺碑記尤多且洪武初年始入山海志古蹟雖未詳而大畧可考倘盡采其碑記則亦如惠州矣 又云洪武錄大寧有新城木榆等衛此非定名也其二灤陽口外富民寬河栢山會州新城大寧等處宜置七驛今考灤陽驛五十里爲富民而寬河而栢山而會州而季莊而富谷皆六十里而七十里乃大寧都司今灤陽驛移於三屯則多四十里矣古城在喜峯或自口外移入也 又云憲章諸錄皆列開平東西八驛名

東四

驛曰涼亭沈阿賽峯黃崖接大寧古北口西四驛曰桓州威胡明安隰寧接獨石

今考元大

都六十里至順義七十里至密雲六十里至石匣六十里至古北口而出五十六里爲青松東北六十里爲興州中屯西五十里爲古城六十里爲灰嶺五十里爲灤河又五十里爲黃崖又六十里爲哈八又五十里爲沈河又四十里爲東涼五十里爲開平大都至此七百五十里地高井深星大北去慶州多古松號曰千里松林宣德五年徙衛于獨石棄地三百里失龍岡灤河險而獨石非通塗原無驛也